

欽定四庫全書總目卷一百九十二

集部四十五

總集類存目二

浙元三會錄

無卷數 浙江巡撫採進本

明楊守陞編守陞有碧川文選已著錄是書乃以
浙江解元同仕於朝者邀爲文會其六元文會始
於成化六年范理商輅姚夔楊守陳盧楷及守陞
也至成化十五年復爲七元會則胡謐沈繼先楊
文卿黃珣謝遷及守陳守陞也成化二十二年再

爲後七元會則李旻王華胡謐沈繼先謝遷及
陳守阯也守阯兄弟後先三會皆與焉故守阯錄
贈荅倡和詩文彙爲此編

二戴小簡二卷

浙江范懋桂家
天一閣藏本

不著編輯者名氏所載一曰贅言錄明戴豪撰一
曰筠溪集戴顥撰豪字師文台州太平人成化戊
戌進士官至廣東布政司參政顥字師觀豪之弟
正德辛未進士官至兵科給事中萬姓統譜載豪
所著有贅言錄若干卷太平志載顥有倦歌集又

有筠溪雜藁此本以兩人書簡各一卷合爲一編
蓋摘錄於全集之中而仍以原集標目非其完本
也

宸章集錄一卷

左都御史張
若淮家藏本

明費宏編宏有文集已著錄此書乃嘉靖五年六
月十三日世宗御平臺召宏及大學士楊一清石
瑄賈詠入見各賜御製詩宏得七言古詩一章一
清瑄詠各得五言古詩一章宏等疏謝竝依原韻
和進帝復賜以批荅宏因集爲一帙梓而傳之明史

宏本傳稱帝嘗御平臺特賜御製七言詩一章命
輯倡和詩集署其銜曰內閣掌參機務輔導首領
其見尊禮前此未有張璫桂萼滋害宏寵萼言詩
文小技不足勞聖心且使宏得憑寵靈凌壓朝士
帝置不省云云然則此書乃承世宗之命所編也

振鷺集一卷

衍聖公孔昭
煥家藏本

明陳鎬編鎬有闕里志已著錄宏治十六年孔子
六十二代孫襲封衍聖公孔聞韶入覲京師事畢
將還朝臣咸賦詩贈行館閣自大學士劉健以下

三十五人爲一軸吳寬爲之序卿寺自馬文升以下三十六人爲一軸謝鐸爲之序聞韶爲李東陽壻故朝士出東陽之門者又別爲一軸凡二十一人靳貴爲之序鎬時爲山東提學副使乃合而梓之以聖系出自殷後故以振鷺爲名然衍聖公非三恪之列數典頗爲不切也

聯句私鈔四卷

兩江總督
採進本

明毛紀編紀有密勿稟已著錄是集前有引一篇稱昔在翰林與僚友及諸司善鳴者會晤遊賞多

形之聯句得二卷後爲部佐與同年數公相處
事感懷復得一卷其末卷則在內閣與諸老同作
者總七言律二百二十五首排律二首五言古詩
一首歸田後葺錄爲一帙竝題姓名履貫於卷首
自華亭顧清以下共三十有三人

古黃遺蹟集一卷

兩淮鹽政
採進本

明盧濬編濬天台人成化丁未進士宏治中官黃
州府知府是編輯黃州古蹟題詠大旨以詩賦爲
主而以唐許遠祠祭文三篇錯雜諸詩之內又宣

聖遺像碑記亦附卷末頗無體例至王禹偁黃州竹樓記在耳目之前轉遺不採亦莫喻其故也

文翰類選大成一百六十三卷

兩淮馬裕家藏本

明李伯璵馮原同編伯璵上海人官淮王府長史原慈谿人官淮王府紀善是書卽奉淮王之命作也前有淮王序自稱西江頤仙案明史仁宗子淮靖王瞻墺以永樂二十二年封宣德四年就藩饒州瞻墺子康王祁鈐以正統十一年嗣封此書作於成化宏治閒則所稱頤仙者卽祁鈐也其書總

錄前代及明人詩分體編次每體之中各以時代
爲次採掇頗詳然愛博而無所持擇往往乖誤如
以梁劉琨爲晉劉琨以班婕妤好詩爲漢宮怨以阮
籍咏懷爲咏歌以宋楊傑爲不知爵里皆疎舛之
甚者至於李白詩中收入李赤詩又以吳隱之爲
唐人與李義山同編尤爲顛舛

古括遺芳四卷

浙江巡撫
採進本

舊本題南山鄭宣撰不著時代亦無序跋考書中
所錄止於明天順中則明人也其書裒輯處州之

文凡三十三家分序文奏疏策論辨說四門採摭甚略似乎鈔撮志乘爲之未博考於諸集其考證亦多舛陋如著漢雋者本林鉞見書錄解題而以青田志不載鉞有著述疑之至以鮑彪戰國策序誤疑爲劉向之文則更異矣

羣公小簡六卷

浙江范懋柱家天一閣藏本

不著編輯者名氏前有成化乙未徐傳序稱蘇文忠方秋崖趙清曠盧柳南孫仲益五先生之所著而第六卷乃爲歐陽修作其第一卷題五先生手

簡自第二卷以下又題曰六先生手簡後有成化二十年周信跋稱出醉翁帖一帙贈徐徐亦以此書報贈又稱捐俸命工仍舊本重刊則末一卷爲信所增入其改題六先生亦信所爲也蓋明代朝覲述職之官例以一書一帕贈京中親故其書皆潦草刊版苟應故事謂之書帕本卽此之類其標題顛舛固不足深詰矣

太白樓集十卷

浙江范懋柱家天一閣藏本

明蔡鍊編鍊字懋成餘姚人宏治庚戌進士官工

部主事此編乃其管理山東河道時以濟寧州城東南有太白樓爲李白遺蹟因錄諸題詠碑刻之文合爲一集而二賢祠碑亦附入焉二賢祠者州人所建以祀白及賀知章者也

東甌詩集七卷補遺一卷續集八卷

江蘇周厚堦家藏本

明趙諫編諫字士忠溫州人初成化中樂清蔡璞嘗輯溫州一郡之詩自王十朋以下爲七卷又補遺一卷諫以其去取爲未善乃因蔡本而增損之溫州知府趙淮序而刊之又爲續集八卷或補人

或補詩以拾蔡本之遺諫自序之竝刻於宏治庚戌其體例頗雜不出地志之積習如張子容本襄陽人爲樂成尉故其詩多永嘉所作子容及孟浩然集中諸詩班班可考續集乃以爲永嘉人然則謝靈運集不當同入此選歟

金華正學編十二卷

兩江總督採進本

明趙鶴編唐邦佐重輯鶴字叔鳴江都人宏治丙辰進士官至山東提學副使邦佐字維良蘭谿人隆慶戊辰進士官至光州知州初嘉靖閒鶴官金

華知府以宋呂祖謙何基王柏元金履祥許謙皆
金華名儒因錄五家之文涉於講學者數篇及其
本傳行狀墓誌等各爲二卷萬歷庚寅邦佐復取
鶴原書爲之刪訂而益以明章懋以祖謙朱子之
友基等皆傳朱子之派故命曰正學

金華文統十三卷

副都御史黃登賢家藏本

明趙鶴編是書於正學編外兼錄金華耆舊之文
宋宗澤梅執禮潘良貴鄭剛中賈廷佐范浚陳亮
呂祖儉徐僑何恪時少章喬行簡等十二人元柳

貫張樞吳師道黃潛吳萊等六人明宋濂王禕蘇
伯衡胡翰戴良吳沈王紳章懋等八人而宋濂所
錄獨多蓋視諸人較呂祖謙等爲稍亞故所錄亦
稍寬然前列呂祖謙修文鑑法朱子取文字法及
王柏吳師道論文之語則大旨仍以講學爲宗故
劉孝綽駱賓王舒元興之文皆所不取然唐仲友
亦不登一字則門戶之見殊未能化矣

來蘇吳氏原泉詩集八卷

內府
藏本

明吳宗周編宗周字子且號石岡宣城人宏治丙

辰進士官至臨江府知府是編輯其先世以來之
詩始宋迄明據宗周自序稱以先人之作爲內集
外人所贈爲外集附以拙作此本自五卷至七卷
皆宗周詩宗周詩後益以按察司副使大本貢士
蔡府庠士本又有宗周拾遺而無所謂外集者蓋
其後人所損益已非復宗周之舊矣

唐文鑑二十一卷

安徽巡撫
採進本

明賀泰編泰字志同吳縣人宏治己未進士官至
監察御史巡按福建是編雜採唐文所見殊爲隘

陋前有林瀚序稱兩漢有文鑑宋亦有文鑑惟唐
一代闕焉如曰一朝必當有一文鑑文何以必當
名鑑也如曰唐文無總集是併姚鉉書未見矣蓋
明代書帕之本其紙繆往往如此

洞庭君山集三卷

兩淮馬裕
家藏本

明胥文相編文相巴陵人宏治乙丑進士官至柳
州府知府是集纂輯屈原而後歷代題詠湖山及
岳陽樓者共爲一編自載所作二詩淺陋殊甚蓋
特好事者流也

廣文選六十卷

副都御史黃登賢家藏本

舊本題明劉節編節有春秋列傳已著錄是書以補文選之遺前有王廷相呂柟二序皆稱八十二卷而此本實六十卷卷末有晉江陳蕙跋稱節舊本所錄凡千七百九十六篇其中譌字逸簡雜出又文義之甚悖而俚者閒在焉廼以視齟之暇與揚郡守王子松教授林璧訓導曾辰李世用共校讎增損之刻置淮揚書院刪去二百七十四篇增入三十篇云云則此本爲蕙等重編非節之舊矣